

REGIONAL NEWS

HEADLINES:-

1. Mizoram sorkar chuan tunhnaia ruah, rial leh thliin chenna in a tihchhiat sakte chhawmdawlina'n State Disaster Relief Fund (SDRF) atangin cheng nuai 450 a pe chhuak tawh.
2. Mizoram Police leh Excise and Narcotics department thawktute chuan kumin January ni 1 leh March ni 31 inkar (thla thum) chhung khan heroin kg 38 leh gram 360 an man.
3. Vote thlak hma a ni 10 chuang awrh a awm tawh avangin Mizoram Lok Sabha bial inthlanna lo awm tur atan party tinin theihtawp an chhuah chho mek.
4. Lok Sabha inthlanpui neih hun tur puan anih atanga ni 20 chhungin Suidha Portal-ah dilna, sing 7 sang 3 chuang a lut tawh.

<><><>

DISASTER-RELIEF

Mizoram sorkar chuan tunhnaia ruah, rial leh thliin chenna in a tihchhiat sakte chhawmdawlina'n State Disaster Relief Fund (SDRF) atangin cheng nuai 450 a pe chhuak tawh.

March 31 leh April 2 inkar chhung khan ruahsur, thli tleh leh rial tla avangin Mizoram hmun hrang hrangah chenna in 2,646 a chhia. Chenna in chhia 2,646 zinga 335 chu luahzui tlak lohina chhe vek a, 2,311 chu a chhe vek lo thung. Thli, ruah leh rial tla avang hian mi pakhatin nunna a chan a, mi 5 an hliam a an zinga pakhat chu State Referral Hospital-ah enkawl mek a ni. Chenna in chhiate chhawmdawl thuai an nih theihna atan SDRF nodal department Disaster Management & Rehabilitation (DMR) department chuan hma an la nghal a, DMR minister K Sapdanga hovin April 1 khan official-te an thukhawm a. Chhiate tuarte chhawmdawlina atan SDRF fund atangin hmanhmawh takin rangva leh silpauline lei nghal tur a tih a nih angin thupek siam nghal a ni. Rangva hi eng emaw zat lo thleng tawh. Hei bakah hian DC-te'n SDRF fund an kawh sa theuh atangin hmanhmawh takin a theih ang angin chhiate tawkte hnenah tanpuina an lo pechhuak mek zel bawh a ni.

DMR department chuan SDRF fund pawh hi a bik takin a dil belh nghal a, Finance department chuan April 4 khan a pe chhuak. District bawrhapse hnenah a rang lama pe chhuak turin hmalak nghal niin, nimin khan bawrhapse zawng zawng hnenah pek fel a ni a. Bawrhapse hnenah sum pek chhuah hi chhawmdawlina (respond & relief) atan cheng nuai 225 leh (thil tihchhiah lakchhuah leh sak that lehna (recovery & re-construction) atan cheng nuai 225 a belkhawmin cheng nuai 450 a ni.

District bawrhapse 11 te hnenah sum pek chhuah zingah Aizawl district pek tam ber a ni a, cheng nuai 100 pek a ni a, Lunglei district-in dawtin cheng nuai 50 pek a ni a. Kolasib, Champhai, Serchhip, leh Saitual district-te chu cheng nuai 40 theuh pek an ni a. Lawngtlai, Mamit, Khawzawl leh Hnahthial district te cheng nuai 30 theuh pe-in Siaha district chu nuai 20 pek a ni.

<><><>

LIGHTNING STRIKE

Vawiin khan Lawngtlai District-a Sakeilui-II ah Ṭekin mi a deng hlum.

Thu dawn danin Ṭek in a den hi Mithun Chakma Kum 31 a upa niin, a nupui leh a fate 3 naupang tete a kalsan a ni. Mithun Chakma hi an thenawmah chaw eitura an sawm avangin a kala chaw an ei lai takin Ṭek hian a deng a, ka pawh chhawn lovin a boral nghal a ni.

<><><>

DRUG SEIZURE

Mizoram Police leh Excise and Narcotics department thawktute chuan kumin January ni 1 leh March ni 31 inkar (thla thum) chhung khan heroin kg 38 leh gram 360 an man.

Police Chief Public Relations Officer leh IGP (Headquarters) ni bawh Pu Lalbiakthanga Khiangte hnen atanga thu dawn danin thla thum kal ta chhung khan Police-in heroin kg. 19 leh gram 790 bakah Methamphetamine kg 27 leh gram 277 an man a. Ganja (cannabis) pawh kg. 27 leh gram 200 an man bawh a ni. Ruihhlo a inhnawhnihte lakah thubuui 92 ziahluh a ni a, mihring 120 man an ni bawh a ni. Kumin chhunga an ruihhlo man, heroin, methamphetamine leh ganja te hi tualchhungah cheng vaibelchhe 10 leh nuai 60 chuang hu a ni. Hetih lai hian hemi hun chhung vek hian Excise and Narcotics department chuan heroin kg. 18 leh gram 570 an man a. Police leh Excise & Narcotics department-te heroin man belhkhawm hi kg 38 leh gram 360 a tling. Excise & Narcotics department hnathawkte hian hemi hun chhung hian methamphetamine kg. 106 leh gram 648 an man bawh a, Police-te man nena belhkhawm chuan Methamphetamine man hi kg. 133 leh gram 925 zet a ni.

Hetih lai hian Excise and Narcotics department-in an chhinchhiah dan chuan tun thla thum kal ta chhung khan Mizoramah ruihhlo hman sual avangin mi 12 an thi tawh a. An vai hian heroin leh damdawi dang tihpawlh vanga thi an ni a, thi zinga 10 hi mipa niin 2 chu hmeichhia an ni. Tun hnai-ah Heroin, Methamphetamine leh ruihhlo dang tawlhruk a hluar a, man pawh a tam hle a, hei hi a chhan ber ni a dan kengkawhtute'n an sawi chu a rawn kalna Myanmar mipui sorkar sipai chakna hmanga hnehchuh a nih vang a ni a. February ni 1, 2021 a sipai-in thuneihna an chhuhluh atang khan Myanmar ram, a bik takin Mizoram dep Chin state-ah sorkar inrelbawlna mumal a awm theih tak loh avangin ruihhlo tawlhruk hi tunhma aiin nasa takin a hluar ta a, man pawh a tam a. Tun hma a a gram bi-a man thin kha tunah chuan a kg bi a lo ni ta niin an sawi a ni.

<><><>

POLL-CAMPAIGN

Mizoram Lok Sabha bial inthlanpui vote thlakna hma-in ni 10 chuang awrh a awm tawh a, party tinin tlin tumin theihtawp tak meuh an chhuah chho tawh. BJP BJP Mizoram Election Incharge Devesh Kumar chuan Lok Sabha Mizoram bial inthlanna lo awm tur atana BJP official candidate Pu Vanlalhmuaka chu thlan tlin a nih chuan Union Minister a ni dawn niin a sawi. Chhim lam an fanna a nimina Chawngte (Kamalanagar) khua a hun an hmanna-ah Devesh Kumar chuan Pu Vanlalhmuaka chu sap tawng leh Hindi leh ṭawng dang pawh thiam tak a ni a, Central-a sawrkar leh tur party, BJP candidate hi Mizoram mipuiin an thlang tling a nih ngat chuan Union Minister a ni dawn a ni a ti a. Chuvangin he

hun tha hi bawh pelh lova, Mizoram hmasawna tha a awm theih na'n vote turin mipui a ngen a ni. Pu Vanlalhmuaka pawhin thu sawiin Chawngte chu vawi tam tak a kal tawh thu leh tun thlenga kawng a la chhe reng mai chu a vei thu sawiin thlan tlin a nih chuan kum khat chhungin kawngte siam that vek a intiam a. Ram, hnam leh sakhaw humhalh chungin hmasawna tak tak Mizorama a thlen a tiam bawk a ni.

Congress party candidate Pu Lalbiakzama chuan kar tawp lama Hnahthial leh Serchhip district an fanna-ah BJP sorkar kal chhoh dan enin hnam leh sakhaw betu tlem zawkte tan a him lo hle a ni a ti a. BJP hi an sorkar chhunzawm zel a nih chuan Uniform Civil Code (UCC) chu dodal mah ila hman luh a ni dawn a ni a ti a. Hei hi Kristiante leh sakhaw tenau dang, tlangmite tan thil pawitak a ni dawn a ni a ti bawk. Mizoram thenawm Assam assembly-in tihdam rawngbawlina hna thawh theih lohna tura dan a siam chuan Mizo missionary-te tan harsatna namen lo a siam mek a ni a ti a. Heti chung a BJP dodalna chang hre lova an lama tan sawimawi an la awm chu pawitak a tih thu leh a tawpah chuan Mizoram mipuite tawrhna thlentur a nih thu a sawi a ni.

Lok Sabha inthlan lo awm tura MNF candidate Pu K. Vanlalvena chuan Lok Sabha inthlanah hian a lo tling a nih chuan, ram, hnam leh sakhaw him na'n theih tawpin a bei chhunzawm zel dawn niin a sawi. Nimina Aizawl khawpui hmun hrang hranga kawthlera inthlan campaign beihpui an thlakna-ah Pu K. Vanlalvena chuan political party hrang hranga 40 vel awmkhawmna NDA-ah MNF chu a awm mek thu sawiin, NDA-ah hian Kristian MP engemawzat an awm niin a sawi a. Kristian MP-te'n NDA hi chhuahsan vek sela chuan Kristiante nek chepna a nasa leh zual dawn tih hriat a ngai a ni a ti. Hindu-te nek chep mek Kristiante thlavang hauha ding tlat turin a chung atana bei tura a thut tlat a ngai niin a sawi. MNF hruaitu dangte pawhin Mizoram, hnam leh sakhaw humhalh tur leh Mizoram chhehvela zofate thlavang hauh zel turin Pu K. Vanlalvena chu thlantlin a ngai a, Zofate leh Zoram tana mipui candidate a ni, an ti a ni.

Nimina Champhai Vengthlang a kawthler inthlan campaign an buatsaihah Lok Sabha Mizoram bial inthlanna a rorellai ZPM candidate Pu Richard Vanlalhmangaiha chuan Mizoram thlaitharte leh kut themthiam hmanga thil dehchhuah te pho chhuah na'n Delhi ah Sales Emporium buatsaih a tum thu a sawi. Candidate campaign puitu Sports Minister Pu Lalnghinglova Hmar pawhin thusawiin Mizoram atanga Lok Sabha inthlan lo awm turah candidate mi paruk zingah ZPM chuan central-ah zawmpui nei lovin ZPM MP a ni tawp dawn a ti a. ZPM chuan NDA emaw I.N D.I.A emaw a zawm dawn lova, 'issue based' in a thu a zir zel leh Mizoram mipuite duhdanin an kal thei dawn bik a ni a ti a. Candidate dangte chu a mimalin tumah tha lo a tih loh thu sawiin an danglam bikna erawh chu, tu thuhnuai mah ZPM MP hi a awm ve dawn lo a ni, a ti a ni.

<><><>

POLL-OBSERVER

Mizoram Lok Sabha bial inthlanna tur atana Police Observer Pu K. Satyanarayan chuan Mizoram inthlanna muanawm taka a kalpui dan hi state dangte entawn tlak 'model' a ni a ti.

Nimin Khan Police Observer Pu K. Satyanarayan leh Expenditure Observer Pi Anita Rinesh hovin Lok Sabha inthlan lo awm tur chungchangah Lunglei-ah inkhawm buatsaih a ni a. Pu K. Satyanarayan chuan Mizoram in Boruak muanawm tak hnuai inthlan kalpui a nih dan hi India ram state dang te tana entawn tlak Model tling ni hial a hriat thu sawiin, Model Code of Conduct zawm

that te pawh an pianpui thil ang mai a ni a ti hial a. Mizoram in inthlanpui a hmachhawn dan te, Inthlanpui atana a inpuahchah dan te, Inthlanna muanawm leh felfai a awm theih na'na mipui mimir, tlawmngai pawl, Kohhran leh MPF ten pheikhai rual taka hma an lak dan hi India ram pum leh BBC-ah te hial puanzar tlak a ni, a ti a. MCC hi ram pumin a hmanna a la rei loh telul nen, Mizoramah chuan an lo zawm sa thlap mai, a ti bawk.

<><><>

SUVIDHA PORTAL

Election Commission chuan kum 2024 inthlanpui neih hun tur puan anih atanga ni 20 chung lekin Suvidha Portal-ah dilna, sing 7 sang 3 chuang a lut tawh, a ti. Suvidha Portal hi online-a inthlan kaihhawih dilna hrang hrang theh luhna a ni a, heng zingah hian rally huaihawt, party office lailawk hawn, vote zawnga in tina luh lawr, campaign nana video van, helicopter leh lirthei hman leh party fakna pamphlet sem dilna-te a tel a, tun thlengin dilna sing 4 sang 4 leh 600 chuang pawm a ni tawh a, sing 1 sang 1 leh 200 vel hnawl a ni thung a ni.

Tamil Nadu atangin ngenna lut tam berin sing 2 sang 3 chuang a lut a, a dawttu West Bengal atangin sing 1 sang 2 vel lutin a pathumna, Madhya Pradesh atangin dilna sing 1 chuang a lut a ni.

He portal, suvidha.eci.gov.in atangin political party leh candidate-ten engtik hunah pawh khawi hmun atang pawhin dilna an thehlut thei a, online lo pawhin a thehluh theih tho a ni.

<><><>